

•sawcuenh•

Souma Coenz Vahmieng

收回的誓言

□ Vangz Civeij / 黄志伟

Godaih cim go' ngeih, go' ngeih cim godaih, doeklaeng go' ngeih naeuz: "Daegnuengx, haj cien maenz dou doxfaen lo. Gangj coenz vah soh, daxboh lij youq seiz, de caeueq mwngz caemh ranz, seizneix de mbouj youq lo, caemh dwg mwngz guenj. Mwngz geijlai bi mbouj dauqma sauqmoh, song boux dou mbouj dwg dingj mwngz sauqmoh daxboh lwi? Haj cien maenz neix dangguh gij cienz sinhoj, habcingz hableix o."

Daxmeh nep gaiq nohgaeq ndeu youh cuengq dauqbae, ngveq gyauej raemxda couh doek okdaeuj. Godaih naeuz: "Daegnuengx mwngz seizneix suenq dwg vunzrog lo, gij saeh gvaqlaeng daxmeh hix mbouj dwg mazfanz song boux dou, haj cien maenz ngaenz neix, mwngz vihmaz cungj cuengq youq ndawsim?"

"Mbouj dwg aen eiqsei neix, daxboh laeb sigbei cungj aeu laeb ha!" Daegveih naeuz.

"Gij saeh neix caih mwngz guhcawj, mwngz hai cienz dou cij rox guhhong, mwngz sien hai bet cien maenz daeuj gonq." Song daeggo naeuz.

Mbwn laep raixcaix, godaih go-ngeih couh yienghneix mbouj angq dauqbae. Daegveih buenx daxmeh youq geij ngoenz, de rox mbatneix dauqma, daengz ranzmbanj gij vunz caeueq gij saeh cungj mbouj dox-doengz, daxmeh de baenzngoenz raemxda roengz. Daegveih naeuz: "Meh, caeueq gou bae youq duenh seizgan ndeu, yienghneix aen sim mwngz rox ndei di."

Daxmeh ngauzngauz gyauej.

Ngoenz daihngaih, Daegveih doengh ndang bae Gvangjdungh lo, ngamq byaij ok bakdou, daxmeh song ga gvih roengzdaeuj, song fwngz maenhmaenh gotdawz gij dinvaq Daegveih, de daej mbouj baenz sing naeuz: "Lwg ha, meh mbouj hawj mwngz bae, mwngz bae meh couh dai hawj mwngz yawj!" Daegveih mbouj miz banhfap, cij ndaej youh naengh roengzdaeuj buenx daxmeh gangj vah. Yaep ndeu, godaih couh daengz ranz daeuj, de yawjraen aen ciengzmienh neix, roxnyinh daxmeh yienghneix guh mbouj deng. Godaih dawz doxgaiq gyau hawj mehyah Daegveih, naeuz:

"Sou bae ba, bouxgeq cungj dwg yienghneix, sou bae le, de yaepseiz couh ndei." Daegveih caeueq mehyah de ngamq daengz bakmbanj, go' ngeih couh baegfofo buet daeuj, naeuz daxmeh gaengq mbouj miz heiq lo.

Daegveih lumj rumz nei buet maranz, daxmeh de cingq ninz youq gwnz sahfaz, fajnaj nyaeuqnyatnyat venj song roix raemxda, cingq menhmenh lae roengz naj daeuj.

"Meh — Mwngz baenzlawz yienghneix lo? Aeu gvaiq gou, dwg gvaiq gou mbouj deng." Daegveih daejnganga naeuz.

Ciep roengzdaeuj couhdwg hawj daxmeh banh begsaeh. Ciuq gij funksug ndawmbanj, vunz dai aeu hawj goengdauh bae ciudoh. Daegveih daenj aen gyaepmienh, daenj buhhauq hwnj dou ranz bae cingj goengdauh, godaih, go' ngeih youq henz meh soujyauq. Lajmbanj dou, bauxdai itbuen cuengq youq ranz sam ngoenz couh dawz hwnj bo bae, ngoenz cungqgyang dwg goengdauh diuq daucangz, yienghneix couh aeu sai fanh lai maenz ngaenz. Daegveih naeuz song daeggo: "Godaih, go' ngeih, yawj daeuj cienz mbouj gaeueq le, sou ndaej mbouj ndaej demh di okdaeuj gonq, caj gvaq le caiq hawj sou."

"Meh gaen bauxlawz gvaq saedceij, bouxde couh ok ngaenz, song boux go, ndaej yiengjsouh bauxlaux maz? Lienz lwnyez dou, de hix mbouj ndaej daiq." Saujdaih naengh youq henz faex ciengj gangj. Godaih, go' ngeih itcig mbouj oksing, Daegveih sikhaek raemxda lumj fwn doek.

Bouxdauh ciudoh daxmeh gij sing ciengq ging sing doeg ging mbouj dingz mbouj duenh, Cejdaih, Cejngaih daej le youh dingz, dingz le youh daej. Daegveih youq henz cejdaih, de beng genbuh Cejdaih, eiqsei naeuz mbouj caiq daej lo. Cejdaih naeuz Daegveih: "Nuengx, godaih go' ngeih doengzcaez ok ngaenz lwi?" Daegveih ngaekngaek gyauej. Cejdaih laebdaeb naeuz: "Gou mbouj miz geijlai, couh hawj mwngz haj cien maenz, yawj mwngz hojlien lai." Yienzhaueh daj ndaw daeh vaq aeu cienz hawj Daegveih. Saujngaih naengh youq doiqnaj yawj bauxdauh

saetdiuq, de raen cingcing cujcuj, de doq baenggyaeuej naeuz Saujdaih: "Bajdaih, mwngz yawjranz raeuz sam mehmbwk, doengzcaez ok ngaenz ne."

Saujngaih naeuz 'Sam boux mehmbwk' coenz vah neix, bauhamz Daegveih youq ndaw dem. De gangj le, mbwnj bak riu hwnjdaeuj, gij yienghsiengq haenx lumj duz fangz-byaiz nei.

Ciuq gij funksug lajmbanj, yaek dawz bauxdai hwnj bo bae, aeu ra bet bauxsai daeuj ram faex, heuhguh "bet daih ginhganh", mbouj ndaej lai boux, hix mbouj ndaej noix boux. Hab ra bauxlawz? Daegveih siengj daengz gyoengq doih Daeggyaeq, Daeg-yiengz, Daegniuz, de caennadang bae gvih cam sam boux hujgeiq neix, hoeng gyoengqde bauxboux cungj mbouj leix Daegveih, dauqfanj vut coenz vah hojsouh he hawj Daegveih: "Bouxlawz hawj mwngz haq okbae? Mwngz mbouj dwg hojgeiq dou." Daegveih raemxda doek lo.

Hwnj bo couh yaek daengz lo, "bet daih ginhganh" lij ca boux vunz ndeu. Daegveih siengsim daengz dingj lo, de hixnaengz duet gyoengq buhhauq, doengzcaez ram daxmeh de okdou bae.....

Daj seizhaenx hwnj, Daegveih mieng okbak naeuz caiq mbouj dauqma ranzcoj. Ngeihcib bi gvaq-bae lo, Daegveih cungj youq baihrog gvaq saedceij, lwg de hix hwnj daihhag lo. Bi' gvaq ndwencieng, dahlwg de naeuz: "Daxboh, gou yaek gunghcoz lo, raeuz dauqbae mbanjcoj sauq moh goengbaeueq ba." Daegveih sim lumj mid yoeck, hoeng lij wh dahlwg dauqbae.

Bae daengz mbanjcoj, Daegveih ra ranzgaeueq mbouj raen lo. Cij raen goemq aen diengzdiet ndeu, ndaw diengzdiet ciengx cibhaj duz cwz. Gyoengqde bae daengz gyawj, ndaej-nyi duzcwz "mo mo" heuh mbouj dingz, dahlwg Daegveih cibfaen sim-angq, aeu fwngz bae lumh aen gyauej duzcwz, doq lumh doq naeuz daxboh de: "Mbanjcoj baenzlai ndei, mwngz baenzlawz mbouj ciengz dauq ni?" Daegveih mbouj dap. Godaih naeuz Daegveih: "Mwngz geijcib bi mbouj dauq, faq ciengz ranz doemq lo, gou doi biengz aeu daeuj ciengx cwz, bae

ranz gou naenghnaengh gonq ba, mwngz yaek yungh gij dieg neix gou caiq hawj mwngz."

Daj ranzgaeueq bae ranz godaih, couh aeu bwh gaeq bae baiz bohme, bae daengz henz moh daxboh, Daegveih raen aen moh doiqnaj laeb gaiq sigbei ndeu. Go' ngeih mbouj eiqsei naeuz: "Daegnuengx, gvaiq gaxgonq gungz lai, cawqcawq doiq mwngz mbouj ndei, bonjlaiz hawj daxboh laeb sigbei wnggai caez ok ngaenz, hoeng, dou dauqfanj aeu gij cienz mwngz daeuj faen lo, geij bi daeuj, bauxboux ra ngaenz ndaej lai, gou caeueq godaih couh laeb sigbei hawj daxboh."

Daegveih ndingq laeuj hawj daxboh, mbouj siujsim song caek raemxda doek roengz ndaw cenj laeuj bae.

Baiz bohme dauq lo, youq laeng godaih gwn caeuz, cij raen gyoengq-vunz gwn haeuxam, mbouj raen gwn cuk haeuxyangz, Saujdaih naeuz: "Geij bi gonq ndawmbanj haifat mboq lajnamh, cou raemx hwnjdaeuj ndaem haeuxnaz, seizneix daengx mbanj vunz cungj gwn haeuxnaz caez."

Godaih ndingq cenj laeuj hawj Dagveih, Dagveih yawj gyoengqvunz gyang congz, bauxboux cungj gwn cenj laeuj ndang gaeueq. Daegveih cam: "Seixneiz gwn laeuj mbouj doxvuenh lwi?" Godangz naeuz: "Doxvuenh mbouj veiswng, gag boux gag gwn." Gwn daengz byonghgyang, Godaih dawz dab ngaenz he okdaeuj, ndenq hawj Daegveih naeuz: "Godaih doiq mbouj hwnj mwngz, gij cienz dwg gaxgonq mwngz hawj daeuj laeb sigbei daxboh, seizneix doiq dauq hawj mwngz." Daegveih mbouj aeu, dawz cenj laeuj hwnjdaeuj gaemz ndeu gwn liux.

Dauqbae seiz, Daegveih sim-luenh lumj cagndaij, de ngeix daengz mwhhaenx mieng coh mbwn gvaq mbouj caiq dauq diegcoj coenz vah haenx seiz, de ienq youq ndawsim. Yienghneix, de couh cam dahlwg: "Dahvaz, mwngz naeuz, gij vah mieng gvaq haenx ndaej souma ma?" Dahvaz riu naeuz: "Couh yawj mwngz miz mbouj miz caen' ei q lo, mwngz miz caen' ei q, gwnzmbwn rox hawj mwngz gihvei souma."

(2 sat)